



Usme di sâl, cjants e svôi di altris uciei, un altri cjalt e a la fin il mâr, indulà che Mario si pierdeve cjalant lontan inte direzion de stele polâr: de bande dai lûcs indulà che al jere nassût.

Mario dopo il so lunc pelegrinâ al jere finît là che i devin il bundì cuntune altre fevele, ma che lu stes, i pinsîrs, lis rispuestis che i scorevin vie pal cjâf e tal cûr a chei salûts forescj a jerin simpri in chê lenghe che e doprave sô none cuant che canai lu braçolave.

Cussì Mario che di un pieç al veve lassade la sô int, la sô tiere, no si sa se par volontât dal destin o par cetant di zingar che al veve dentri, nancje che la ves metude te valîs, si puartave simpri cun se, come il ricuart dal prin amôr, la sô lenghe, la fevele dai prins agns de sô vite.

Chê lenghe, che se ancje di tancj agns al jere lontan d'indulà che la fevelin, e restave par lui la lidrîs dai siei pinsîrs plui profonds. La stesse lidrîs che e guviernave lis leçs no scritis di chel vecjo mont contadin stampât tai voi e tes animes dai siei vons.

Une lenghe che e vuarde tal so grumâl l'unic metri che i à simpri permetût di podê dividi il ben dal mâl, il just dal sbaliât, ancje se tantis voltis segnade di superstizion, magjie e rassegnazion.

Ma Mario, lu stes, su dutis lis stradis là che i siei pîts lu àn puartât, la sô fevele le à simpri mantignude, doprantle ancje tra chei lengaçs dal dut diferents dal so.

Buon giorno, come va?

Bonjuor, comme ça va?

Good morning, how are you?

Ma ancje denant a chei saluts, par prin dentri tal so spirt al à simpri rispuidût cuntun biel bundì, dut ben. E tantis voltis lassantsi scjampâ vie da sô bocje ancje un biel mandi.

Une falope? No no, un don, un bon segnâl dal destin. In fat plui di cualchi volte si è sintût rispuidi te sô lenghe: ma sêstu ancje tu un Furlan?

Veretât, i furlans e son come i savôrs, si cjatin par dut: baste saludâ simpri dome cuntun biel mandi.

di Nello Malisano